

國朝先正事略

國朝先正事畧卷四

名臣

平江李元度次青纂

趙清獻公事畧

趙公廷臣字君鄰。漢軍鑲黃旗人。順治二年由貢生知山陽縣。遷江甯府同知。兼瓊運務。能其職。尤加意生儒。優其家屬。不以僉運嘗攝知府事。時值編審。以精核著稱。亡何坐催征逾限。免十年大學士洪承疇經畧湖廣疏薦。公清幹有爲。授下湖南兵備道。嘗秉燭治官書。至丙夜曉起。百函並發。左右不得行其私。平反冤獄。剖決無留滯。加意恤民。行路爲之感泣。尤嚴絕苞苴。歲時饋獻不敢至其門。十五年隨大兵定貴州。遂授巡撫。明年

擢雲貴總督時兵燹之餘繼以荒歉公調劑兵民不遑食息性不喜繁侈每行部不過數騎甚有不知其至者先是土寇馮天裕等踞山寨屢出攻劫公調兵擊破賊營斬天裕及偽總兵冉宗孝等疏言貴州古稱鬼方自城市外四顧皆苗專事鬪殺故馭之爲難臣以爲教化無不可施之地請自今應襲土官年十三以上者皆令入學習禮由儒學起送承襲其族屬子弟願入學讀書者許其仕進則儒教興而悍俗可變又每歲終土官各上其世次之籍於布政司報部乃許承襲斯爭端可預杜尋奏改馬乃詣土司爲流官又言滇省田土荒蕪當急招民開墾請以順治十七年本省秋糧貸爲春種之資會吳三桂以五象進

獻

上命停止送京。公因請槩停邊貢。以省解送之勞。並從之。以勦平土酋龍吉兆功。加兵部尚書。康熙元年。調浙江總督。加太子少保。疏言。浙中逋賦不清。由征解繁雜。請以一條鞭法征收。卽以一條鞭法起解。令各屬隨征隨解。由布政司察明注册。至爲簡便。又請移海島投降官兵。安插內地。以杜賊煽誘。定水師提鎮各營兵制。以練水戰。杭嘉湖三府。昆連太湖。御湖最易藪奸。請增造快船。撥兵巡哨。部議俱從其請。時海寇鄭成功死。公招其黨僞將軍阮美都督鄭殷侍郎蔡昌登等相繼降。獨明魯王之兵部張煌言率眾盤踞浙島多年。最稱狡脫。公親赴定海與

提督哈爾庫張杰等定議檄水師由甯台溫三府出洋搜剿斬敵兵六百有奇降其副將陳棟知煌言披緇竄伏海島乃遣騎將徐元等詐爲僧人服率健丁潛伏普陀山朱家尖蘆花畧三路以伺遇閒謀船急擊之獲其故校誘使言煌言竄處卽駕所獲船以夜半至懸轡出山之背攀藤上潛入其帳擒煌言獲其敕印疏聞得旨嘉獎煌言死之煌言者明鄞縣舉人也大軍下江南時浙東拒命煌言迎監國魯王於天台累官兵部尙書嘗航海至翁洲扈魯王再入閩尋招軍於天台與故將張名振合軍入長江趨丹陽掠丹徒登金山望石頭城遙祭孝陵逾年與鄭成功陷鎮江下蕪湖及微甯池太等屬爲我總兵梁化

鳳等所敗遁入臺灣成功尋沒於臺魯王亦殂煌言遂散軍居南田之懸巖懸巖在海中荒瘠無人惟山南有汊港通舟楫北則峭壁乃結茅其間蓄雙猿同動靜敵舟在十里外則猿鳴樹杪得準備至是軍以夜至始爲公所擒初煌言之航海也公係累其家屬以入告。

世祖命無庸籍沒卽令其父以書諭煌言煌言復書曰願大人有兒如李通勿爲徐庶兒他日不憚作趙苞以自贖其父亦潛寄語曰勿以我爲慮也公與江督郎廷佐提督張杰累書招煌言皆不屈公仍厚待其家及煌言被執公命寄獄中而供帳甚盛許其舊部曲得來慰問官吏願見者弗禁杭人爭賂守者求

人見或求書煌言亦應之既就義遺民萬斯大等請葬煌言於南屏山在岳忠武子忠肅二墓之間公亦許之嗚呼煌言之忠固不愧文信國而公之賢實遠出張洪範上而

仁祖如天之大度益可想見矣軍興以來度支苦不給公疏請復二十四監鼓鑄泉貨遂通四年疏請崇節儉以維風俗又言用人宜寬小胥請敕部分別陞謬降革人員量才錄用以收得人之效又言駐防滿洲收買民人宜令地方吏給印契并曉諭諸鄰俾知某人鬻身旂下後或逃歸有容留者乃可坐以窩逃罪事並下郎議行會部檄各省流寓人責令回籍公疏言落職罷任之員應卽回籍其身故而子孫願留及流寓已有丁賦

大版圖者聽自便得。旨漢軍速催回旂。餘如所請五年招降。鄭錦之僞都督李順等。六年夏以疾乞休。溫詔慰留。八年二月薨於位。公泄浙八年多惠政而折獄尤敏。有瞽者入屠者室。呼無人竊其簪中錢而走。屠者追之。則搏膺而詈曰。天平彼欺。吾瞽而奪之錢也。公令投錢盎水中。見浮胎以錢還屠者。有殺人者。既誣服矣。公曰。傷不及寸而刃盈尺。必冤也。戒吏更求之。得真殺人者。夏大旱。山中人皆言魃至。丹頰赤髯。絳衣冠。入門輒失財物。公笑曰。非魃也。令邏者伺之。遂獲盜。營中將士多駭。悉公嚴抑之。告許不得逞。時浙東初平叛。獄屢起。公平情讞。物全活者多。遇忠義士之咎爲其主者。誠有司不得駢坐其家屬。



人以爲尤難遺疏上。賜祭葬如典。予諡清獻。廕一子入監讀  
書。論者謂公一生清節誠足與宋趙清獻公先後媲美云。

李忠襄公事畧

李公率泰字叔達漢軍正藍旗人父永芳明撫順游擊歸命官至總兵公其次子也初名延齡年十二卽入侍禁廷

太祖皇帝賜今名以宗室女妻之弱冠從征察哈爾天聰間從征朝鮮崇德間從征明錦州又從征山東並有功洊擢副都統順治元年授刑部參政兼副都統帥師駐防錦州四月隨睿忠親王入關破流賊李自成尋同都統金礦招撫天津又帥甯遠駐防兵平定山東河南擒斬滿家洞賊將趙應元降其眾萬人二年隨豫親王破流賊於潼關移師南征克揚州下江甯分領精兵三百徇蘇州松江所過城邑悉撫定惟江陰典史閻應元

陳明遇等閉城抗拒逾月。督兵攻破之。豫王命公駐防蘇州。會  
明將吳志葵黃蜚來犯。時城中驍騎僅千餘。公與巡撫土國寶  
登盤門塔以望外。兵使百餘騎遶城外。各張幟爲援。兵志葵前  
鋒數百斬西門入。長驅四五里。不見一敵。忽勁騎突起截擊。箝  
之城外。軍轟退。公急令閉城。嚴督薙髮違者斬。髮旣薙。卽驅之  
登陣。內應旣絕。外攻遂潰。蘇州獲全。三年。隨端重親王博洛下  
杭州。定福建冊功。授輕車都尉兼一雲騎尉。五年。海寇犯福州。  
漳泉諸郡。詔公與靖南將軍陳泰同心協勦。至則擒斬賊渠  
曾慶等。及餘黨數萬人。時鄭彩連踪數千踞長樂連江諸城邑。  
公會陳公分兵夾擊。盡驅以出海。復二縣。又統師直入興化。生

擒偽總督顧世臣等十一人。斬之興化平。先是福州爲賊困。十有四月。城中人相食。江西賊郭天才。僞稱援兵。自杉關長驅至福州。駐兵洪塘。載米麥江上。誘郡民出就食。會公提師抵建甯。聞之。卽閒道飛檄。巡撫使偵備賊。乃夜焚洪山橋。掠就食者千人。以遁。公至。命有司收賊餘粟。以甦遺民。巡按御史周世科大治椿杵釘絞之刑。考掠士民。恣取財賄巨萬。巡撫不敢問。公疏劾之。世科伏誅。百姓皆感泣。六年。從征大同。叛鎮姜瓖下保德州。擒斬賊黨牛化麟等。叙功。加一雲騎尉。先是順治元年。更定官制。名參政曰侍郎。公仍以刑部侍郎兼副都統事。八年。調吏部。擢宏文院大學士。條上三事。一懲貪酷吏。二給滿洲兵丁馬。

匹草料一酌量營造工程次第

上從之。尋坐誤增恩詔赦款免降世職爲騎都尉。是年冬奉特旨晉爵三等男。十年以大學士洪承疇薦授兩廣總督。時明桂王朱由榔居安隆。其帥李定國擁兵粵西。十一年土賊廖篤增等結定國爲寇。公遣將分道進剿。陣斬篤增於玉版巢。十二年定國犯粵東。公領兵禦之。敗其將高文貴。會靖南將軍珠瑪喇率禁旅至。合兵夾擊。大破之於新會城下。乘勝逐北。遂復高雷二郡。所至賑恤民賴以安。方新會之被圍也。城中糧盡且食人守者掠取婦女千餘口待斃。公言於諸將盡釋之。十三年加太子太保。調閩浙總督。命兼程赴任。駐衢州。當是時海寇鄭

成功招集亡命爲江浙閩三省邊患公既蒞任相度形勢以賊  
艘來往無常非急整舟師不足資戰守特疏增設水軍三千復  
增造哨船百餘艘爲剿禦計十四年招降海盜陳德容並疏言  
欲剿鄭逆當散其黨羽以撫佐之又言成功父芝龍不宜徙甯  
古塔其地近海恐由此遁患更大

上悉耀其言是歲晉二等男加少保兼太子太保明年招降僞  
都督唐邦杰副將林猷等鄭成功犯溫郡陷平陽瑞安浙東告  
警公調江甯滿兵助剿賊敗去會詔分閩浙總督爲二以都  
統趙國祚督浙江而以公專督福建駐福州賊黨陳斌旣降復  
叛率千餘人據羅星塔公馳檄會師燔其巨艦千餘賊遁因以

舟師圍之。斌降。公奏斌屢叛狀。誅之。康熙元年。公以漳州爲全閩門戶。奏增設水師二千。及副將游擊等官。時賊踞定海之小埕。公密會靖南王耿繼茂。遣兵擊走之。又萬安所。先經遷毀。僞總兵楊宣等復於其地築新壘。公會師夾勦。賊不能支。揚帆遁。未幾。招降僞總兵林俊奇等六十一人。兵千餘人。二年。降僞忠靖伯陳輝等僞官百三十餘人。兵千六百人。家屬八百餘人。復統建甯延平邵武將弁三路進勦山賊。獲逆渠王鐵佛。斬之。居亡何。海賊五百餘人。由梁山突犯內地。公遣將夾擊。大破之。俘馘過半。復與靖南王統帥大兵航海。攻克廈門。乘勝取浯嶼金門二島。鄭錦等勢窮宵遁。三年四月。擒斬甯化山賊錢禾。招降

偽總兵林國樑五月大兵至八尺門偽將軍翁求多率兵民六萬餘人納款。公夜半渡海進拔銅山焚賊巢斬級三千三百有奇。偽永安侯黃廷等率家屬及兵民三萬餘人降。獲船艦軍械無算。鄭錦僅以數十艘遁入臺灣。

聖祖優詔獎敘六月以病乞休。手敕報曰覽奏知卿病當卽允所請。但閩省投誠官員兵民最爲繁眾其親行安插務使得所事竣然後來京。閏六月遣將出洋剿賊擒偽總兵張賢時閩海金廈各島悉蕩平。惟南山鎮海佛潭橋猶爲餘孽盤踞九月公遣將剿之斬賊黨七千有奇。招撫男婦萬餘口。十月別遣兵會剿茶子畚山寇生擒賊首余角。四年再以病乞休。



上慰留之士民亦固請留任五年正月薨於位遺疏言海賊遠竄臺灣奉旨撤兵與民休息洵爲至計第將眾兵繁若掃之太繁則易致驚疑太遲又恐貽患目下當安反側之心日久須防難制之勢至數年以來令濱海居民遷移內地咸苦失其故業宜畧寬界限俾獲耕漁庶稍甦殘喘疏上得旨李率泰自任總督以來忠清卓著勦撫賊寇厥功懋焉今以久任巖疆積勞病殞深堪憫惻下所司議卹加兵部尙書予祭葬賜諡忠襄明年敘功追贈一等男予正宗襲

吳文僖公事畧

國朝二百餘年來。大湖南北登揆席者。前後不及十人。其科目最先。特膺爰立之選者。則江夏吳文僖公也。公名正治。字當世。號廣庵。湖廣漢陽人。父崑有孝行。公登順治五年進士。選庶吉士。授國史院編修。十一年充順天副考官。母憂歸。服闋起原官。十五年遷右庶子。是歲特簡翰林官十五人。外轉。公與湯文正公並與焉。授江西南昌道。歲暮單騎按獄。其非法淹繫者悉釋之。十六年遷陝西按察使。誅巨猾。人皆稱快。所至以清廉執法著稱。十七年詔內陞超遷工部左侍郎。調刑部。釋江南無辜諸生二百餘人。議奉行赦款宜速。丈量宜停止。禁狀外指。扳

嚴婦女私嫁皆著爲令。七年補原官。八年丁父憂。十年補兵部督捕左侍郎。充經筵講官。明年擢左都御史。疏言緝逃事例。首嚴窩隱。一有容匿。雖親如父子。但經隔宿。卽照例治罪。使小民父子視若仇讐。一經投止。立時拏解。若係三次在逃之犯。解到必當擬絞。是甘心置之死地而不恤也。伏思律有親屬容隱之條。惟叛逆不用此律。夫逃人乃旂下家人之事。視叛逆輕重懸殊。在律原無父子不許容隱之語。今縱不便從寬。亦當稍爲區別。繼自今遇父子窩逃。被旁人舉發者。逃犯請照常治罪。免坐窩隱。若容匿逾旬。父子首報解部者。逃犯照自首例減罪。則首報者多。逃人易獲。朝廷之法與天性之恩兩不相悖矣。又疏

言今歲雨澤愆期

皇上恤民念切。方事祈禱。卽沛甘霖。小民正可服勤農桑。不宜以得已之役。致奪農時。近因酌添玉田。潯州。霸州。雄縣。駐防旗兵。因議蓋造營房。伏思鼠竊剽掠。有地方文武官捕治。不煩添設旗兵。肅戢大盜。又非備添數十旗兵。遂可撲滅。雖設兵原以安民。而愚民無知。一旦驟聞添設。未免心生疑畏。至蓋造營房。縱不至攫取民房。而工作方興。未免勞民動眾。應暫停止。俟農隙時酌量舉行。疏下部。並如所請。先是睿親王當國。嚴旗下逃人之禁。釐拜等繼之。禁令嚴株連窮治。天下囂然喪其樂生之心。至園地建營房。凡關涉旗務者。漢官皆莫敢置喙。自

天子俞公議。逃人禁稍寬。居民若脫湯火而營房亦罷。議添建疏出天下。誦之。是年遷工部尚書。調禮部。於典禮多所考正。十三年。應詔舉廉能吏。公疏薦前給事中周體觀。前知州侯紹岐。均下所司起用。十五年。典會試。所得多知名士。若彭侍講。定求。胡尚書。會恩。翁尚書。叔元。王相國。項齡。王御史。奐。曾。誅。給事。承宣。其尤著者也。十八年。自陳乞休。詔嘉其端誠勤慎。慰留之。二十年冬。拜武英殿大學士。時重修

太祖高皇帝實錄。編輯三朝聖訓。大清會典。一統志。平定三逆方畧。公皆爲總裁官。二十五年。實錄成。加太子太傅。二十六年乞休。優詔許原官致仕。三十年閏七月。薨於里第。年七

十有四遺疏入

上震悼。命部臣議卹典閣臣議諡法。詞臣撰代言之文。諭祭葬碑其墓道。親定諡曰文僖。公在政府守成法持大體遇事竭忠勤盡言無隱。

聖祖閱朝審冊有以刃刺人股致死而抵法者。

聖祖曰刺股尚非致命傷此可寬也。公對曰當念死者之無辜。聖祖曰朕非欲赦之當可議緩決耳。他日又閱冊有囚當死。

聖祖問此囚尚可活否。眾皆以情實對。公對曰。

皇上好生之德臣等敢不奉行。退而細檢果得可矜狀遂從末減嗚呼此可見。

聖祖哀矜惻怛之仁而公所對均不愧大臣之言矣公崛起草茅以學行受

兩朝特達之知其大拜後熊文端公五年然文端逾年卽罷相其間人閣在公沒之後十八年公實爲先達居揆席五載以功名終所薦引多一時賢俊論楚材者當首屈一指云

楊以齋侍郎事畧

子忠誦

孫守知

國初臺省諸臣以伉直著聲者推海甯楊公雍正卽臺郭公瑋郭公長御史時疏劾大學士明珠余國柱結黨營私納賄兼及尙書佛倫等並降黜有差又劾河督靳輔詹事高士奇都御史王鴻緒編修陳元龍王頊齡給事中何楷皆罷免直聲震一時然如靳文襄高文恪陳文簡王文恭皆號稱名人郭公痛詆之論者或謂少過惟楊公事

世祖歷三垣三載疏前後三十上嘗一日而上九疏於天下事獨能見其大新城王文簡公稱公爲本朝諫官第一公給事兵科時駕數幸南海子首上疏請慎起居畧言郊原陟歷雖



非敗遊可比。然獸起於前。馬逸於後。驚屬車之清塵。不能無萬有一危之慮。

世祖震怒。宣公跪苑廷。諭以閱兵習武之義。公神色不變。

上徐爲霽容。當是時。平南王尙可喜。靖南王耿繼茂並鎮廣東。公疏言。粵民困苦。由兩藩並鎮。每牧令缺員。市井無賴。輒用重賄營委署。取償民間。凡土木工作役。民無限制。又增立鹽埠。權私稅。縱悍卒鑿山刊木。奪商賈利。正賦外復以藩令採買。曰王穀王席。皆責民供億。民困不支。今川貴底定。請移一藩往鎮。俾粵民甦息。此則盈廷所不敢置議者。公以新進小臣。獨奮舌及之。旣而靖南移鎮。福建實公之謫。論最先有以發之也。海寇鄭

成功陷鎮江。犯江甯。公劾本兵梁清標等。不經畫於幾先。又不圖維於事後。請嚴旨申飭。各鐫級奪俸有差。又疏劾銓政舛錯。下宗人府都察院會議。吏部諸臣並坐降罰。又疏言明季仕途分門立戶。意見橫生。國事遂不可問。由社盟標榜。排擠報復所致。請飭學臣禁士子立社結盟。以杜朋黨之漸。又奏定鄉會試絕營競防弊竇之例。皆下部議行。及

聖祖御極。方在諒闇。輔政大臣索尼。鰲拜等。頗張威福。奏事者見之皆長跪。公入獨立而語。輔臣目送公曰。此南苑上書諫獵者也。自是奏事者皆得不跪。康熙三年十二月。有星孛於翼軫。抵降婁。公時掌刑科印。同官或言此爲含譽星。非彗也。公獨疏。

請

皇上法宮齋戒。下詔罪已。求直言。詳詢利病。有可惠民者。立賜舉行。疏入。得旨。楊雍建直言可嘉。今星象示異。皆政教失宜所致。宜力圖修省。以答

天心。尋詔內外臣工各抒所見。勿瞻顧因循。公又言。治本未登。由於臣職未盡。今部臣議事不肯直辭決斷。或請下督撫。或請移他部。一案之處分。經年未結。一事之行止。重複諮詢。民間利病所關。憚於釐正。輒以往例爲詞。是惟知推諉卸責。而無任事之實心也。督撫知百姓苦於私派浮征。而不爲建長策以除積困。見有司貪暴掊克。明有特糾者。又復摘微罪。引輕條。是惟

以蒙蔽養奸。而無澄清之實政也。請嚴敕內外臣工。力圖稱職。仍前玩泄者罪之。

上韙其言。遂赦天下。公於天安門聽宣讀赦書。是日御前發下紅本二獄囚。當決吏籍紙尾進。請鈔發。公曰。昨頒赦而今日行刑。是詔令不信於天下也。紅本當封還。同官皆變色。爭言不可。公曰。六科以封駁爲職。古制也。吾封之。咎吾任之。不以累公等。有旨。三法司再議。二囚得不死。用是直聲益震朝野焉。公字自西。一字以齋。杭州海甯人。補嘉興府學生。貢太學。順治十二年進士。除高要縣知縣。擢兵科給事中。轉禮科。分校己亥會試。再轉吏科。晉刑科掌印給事中。以疾去。召授戶科給事。

中食四品俸。轉掌禮科。遷兵部督捕理事官。晉通政使。歷太僕卿。擢副都御史。充己未會試副總裁。授貴州巡撫。入爲兵部左侍郎。乞養歸。奉母四載。旣免喪。詔舊任巡撫學政諸臣。分修河工。公奉命修高家堰。以勞成疾。引還。四十三年五月卒於家。年七十有四。賜祭葬如禮。公之令高要也。地當廣右之衝。制府駐節於是。軍行絡繹。供億甚煩。羽檄至。徵民夫動累千百。有逃者。胥吏輒繫之。若牽羊豕。納諸廨舍隙地。凍餒不堪。歲除。飲椒酒。公慶然曰。民夫亦人子也。忍使露宿耶。命徙廨廡下。徹酒饌給之。皆感泣。縣境羚羊峽。產硯。平南靖南兩藩遣掾吏采石。役夫匠無算。篝火入巖穴。有失氣死者。公力請罷役。掾以硯

適公堅卻之人。以比包孝肅。云軍中素榕樹條爲繩。繩以然。激火耐風雨。有百夫長持軍符。下縣徵解。語不遜。公撻之。歸告其帥。帥愬之。制府王公國光。王公曰。此廉吏不可犯也。乃杖百夫長而薦公於朝。遂得行。取入京。考選授給事中。故事。守令歷再。莽始預薦。廣三年。方報最。公治高要。甫一載。就徵。徇異數矣。其任副憲也。疏劾江西巡撫佟國楨庸碌無能。國楨爲元舅。國綱國維之從弟。家門鼎貴。以公疏鐫二秩調用。其出撫貴州也。道次銅仁。無一卒之衛。時吳世璠尙據雲南。賊烽猝迫。城下官屬請避去。公曰。銅仁黔地。巡撫任封疆。去安之。因命燔其後山。開南門以待偵者。賊疑有伏。不敢前。旣至貴陽。疎立營制。禁侵

掠蠲賦稅。省力役。安集流徙。師旋。有失約束者。輒上章劾奏。軍中號爲楊一本舊例。土司謁巡撫。必鳴鼓角。交戟支於門。俾拜其下。公曰。無庸也。引至座前。問疾苦。賜以飲膳。土苗咸輸服。始至。斗米值五千錢。公連章請餉。輓運相繼。拔榛翦棘。教以耕耨。比三年。成樂土焉。

天子嘉公成績。召佐中樞。公在行閒久。西南徼將弁多公所拔。擢遇事得其要領。措置咸宜。公早以文學受知。

世祖。每上章奏。輒稱善。迨巡撫。命下。賜宴瀛臺。例止予鞍。

馬甲冑。公獨拜。命騎入東華門。卹。賜白金五百兩。表裏各。

十端。

聖祖南巡。迎鑾三百里外。賜御書額曰松喬堂。生平一話。一言必準於古。和而介。剛而無虐。故風節獨高一時。所著有黃門疏稿二卷。撫黔奏疏八卷。政學編一卷。景疏樓文集十卷。子四長中訥。字耑木。康熙辛未進士。由編修官中允。督江南學政。罷官後。築園曰拙宜。與許尚書汝霖查編修慎行陳侍御勳修香山洛社故事。少學詩於竹垞。檢討能得其傳。著有叢桂集。孫守知。字次也。庚辰進士。官平涼知府。工詩。與歸安沈樹本平湖陸奎勳嘉善柯煜稱浙西四才子。所著曰致軒集。



王文靖公事畧

公諱熙。字子雍。一字晉庭。號慕齋。順天宛平人。父崇簡。明崇禎癸未進士。國朝順治三年。以薦補選庶吉士。授檢討。累官禮部尚書。加太子太保。嘗疏請。賜卹明季殉難諸臣。范景文。蔡懋德等二十八人。又議定帝王祀典。罷宋臣潘美。張浚。從祀。皆從之。卒諡文貞。公由順治四年進士。選庶吉士。授檢討。十年春。世祖親試習。國書翰林。公列優等。召見。以滿語奏對。大蒙褒賞。累遷司業。中允。洗馬。諭德。召入南苑。校譯大學衍義。及勸善書。遂命長直南苑。常隨獵。賜乘御馬。十二年初。設日講官。以公及學士麻勒吉。胡兆龍等充之。公直講稱旨。

諭嗣後講官不必立講。遂侍坐。尋奉有駕出。卽隨。不必請旨之諭。明年遷侍講學士。又明年晉宏文院學士。時文貞公方任國史院學士。

世祖諭曰。父子同官。古今所少。以爾誠恪。特加此恩。尋充經筵講官。教習庶吉士。典武會試。擢禮部右侍郎兼掌院學士。十七年。

上命造直房。景運門內。公與諸翰林分班直宿。考滿加禮部尙書銜。文貞公適長禮部。父子同部。尙書海內榮之。十八年元日。上不豫。公曰。請安於御榻前。初六日。漏三下。召入養心殿。諭曰。朕勢將不起。可詳聽朕命。撰詔書。公匍伏飲泣。筆不能下。

上命和悲痛。卽榻前起草。公拭涕書第一條進。恐聖躬過勞。奏移乾清門下撰擬。凡三次進呈。皆報爾。初七日薄暮。繕畢。世祖卽以是夕上賓。公偕顧命諸大臣入哭同擬。尊諡及聖祖卽位年號。又爲輔政大臣索尼等撰誓文。至於面奉憑几之言。有事關國家大計。與諸大臣再三密議。而後決者。公終身不以語人。雖子弟莫得而傳也。康熙元年。以禮部尙書管左侍郎事。三年。坐失察欠糧舉人入場。奪尙書銜。五年。除左都御史。疏請嚴督撫狗庇司道處分。又言近例招民百家。送至盛京。得授知縣。不肖奸人。往往借資爲市。宜改給散秩。又言江楚閩粵諸路。王公將軍督撫提鎮。多自置官商。奪民利。又奸商多指稱

藩下挾勢橫行。宜嚴飭申禁。又言官吏捐輸博議敘名。出私橐。實取自民間。宜一切報罷。均從之。當是時。平西王吳三桂。駐雲南。平南王尚可喜。駐廣東。靖南王耿精忠。駐福建。擁兵踰制。三桂尤驕縱。公疏言。一歲賦入。大半耗於兵餉。就雲貴言。歲需餉銀三百餘萬兩。急宜減汰綠旗額兵。其藩下餘丁。亦宜遣散屯種。庶勢分而餉亦裕。詔下所司議省額餉百餘萬。七年夏旱。金星晝見。詔求直言。公疏陳法祖所以敬天。請飭部院諸司詳察見行事例。有因變法而滋弊者。悉遵舊例更正。詔下所司確議。於是鄉會試仍用八股文。又前此各官儀衛踰制。河上立限期。刑部獄囚霜降後不卽朝審。至是皆改遵舊例。其

繁例就刪者復數十事。中外稱便。又疏言。逃人詭稱寄頓財物。不必遽行句取。致累無辜。至窩逃之人物。故其妻子。請免流徙。從之。遷工部尚書。調兵部。十二年。三桂反。明年。公疏言。大兵已抵荆南。元惡旦夕授首。逆子應熊。素憑勢位。黨羽眾多。大寇在外。大慙在內。請速正法。傳首湖南四川。以寒老賊之膽。以絕羣姦之望。以激厲三軍之心。疏入。應熊旋伏法。方滇黔之初告變也。都城內外一夕火四起。尋有僞朱三太子之獄。捕繫數百人。掠治不得主名。皆應熊及其黨爲之。三桂自恃角距已成。又以其子方尙主朝廷。必不殺以爲之招。及應熊誅。三桂驚悸發病。竟以死。人皆韙公之能。聲大義云。十五年。奉諭專管密本前。

此漢官不與聞軍機異數也會詔舉賢能官公疏薦原任御史郝浴候補司道鄭端周體觀詔徵博學鴻儒薦原任推官尤侗中書汪懋麟皆次第錄用十七年丁父憂二十一年卽家授保和殿大學士兼禮部尙書公在政府務以和平寬大宣上德意罷權宜之計停加征之額不沽名不市恩不植黨援於四方利病及國家典制沿革無不周知遇事直陳無隱而己不以己與也二十五年加太子太傅二十七年典會試三十一年以疾請告溫旨報曰

先帝舊臣俱已凋謝惟卿獨在班列雖精力就衰而老成侍左右殊有裨益其勉自調攝不必求罷嗣屢疏乞休四十年入

月。優旨允致仕。晉少傅。賜寶露禁藥。帑幣上珍。明年上元節。賜宴於家。四月。遣侍衛賚手敕於榻前。賜公曰。卿耆年舊德。自去歲告病在家。朕無日不注念老臣也。近日九卿皆求匭額字對。想卿身雖在告。心未嘗不在朝中。故特書匭一聯。一賜卿。卿其勉強餐食。輔以醫藥。慰朕不忘舊臣之至意。復傳諭如病少愈。朕尙欲一見。四十二年上元節。復賜宴於家。越旬有二日。薨。年七十有六。時車駕方南巡。聞訃震悼。命直郡王允禔。大學士馬齊。率侍衛往奠。且傳諭直郡王曰。大學士王熙係

世祖章皇帝舊臣。宜行拜奠之禮。舉哀酌酒。於是王行三叩禮。

大學士九卿等合詞具劄謝恩。尋賜祭葬如例。諡文靖。公立朝五十餘年。盡力抒忠。完全名節。以恩禮始終。性篤孝。十二歲。母梁夫人病革。禱於天。願減算益母壽。文貞公晚歲好遊。常徧歷西山諸勝。公恐其勞於登陟。乃構怡園於宅西偏。蒔芍藥數百畦於豐臺別墅。文貞公顧而樂之。比捐館舍。公年踰五十矣。如孺子。顏書屋曰慕齋。待兄弟友愛。布政使然。巡撫燕金。照皆以公推蔭起家者也。生平邃於經史。工詩文。尤好施與。京師義學。育嬰堂。月有攸助。凡大典禮。如耕藉田。冊立東宮。陪祀闕里。大制作。如總裁寶錄。玉牒。典訓。方畧。國史。明史。一統志。公皆膺其任。前後賜宸翰十餘幅。堂額三。曰席寵堂。曰曲。



江風度曰。耆年碩德。他珍物不可勝紀。公遇事持大體。在上前。或危論。或微言。率能動聽。平定三逆後。撰方畧。

聖祖忽諭閣臣曰。當三桂反時。漢官有言不必發兵。七旬有苗格者。又其時漢官多移妻子回家何也。顧學士韓莢曰。爾爲朕載之。莢退而皇恐。公昌言閣中曰。有苗格。乃會議時。魏蔚州語。告者截去首尾。遂失其本意。然如其言。豈非誤。國移家。偶然耳。日久何從分別。其移者豈非肯。主漢官負此兩大罪。何顏立。朝翼曰。公執奏懇懇。如閣中語。

上微笑曰。固知此二事不可載也。事遂寢。公嘗語諸學士曰。吾昔從駕椒園。

世祖問有子幾人以二子對蒙賜名克善克勤克善實能文  
吾不使與試不然者當丁酉時吾不免作高郵公矣時

上痛懲漢人師生交通之弊公遇鄉會試輒辭免開列戊辰典  
禮部試蓋特命也雍正八年詔入祀賢良祠

李文襄公事畧

李公之芳字鄴園山東武定人順治四年進士任金華府推官  
居五年郡無滯獄入爲刑部主事累遷郎中會六部議啓心郎  
屬公總理十四司覆奏事宜聲績大起十五年擢御史疏陳各  
省錢糧私僉民解之害又言州縣路當孔道迎送往來有曠官  
守請嚴飭禁止皆從之十六年疏劾廣督李棲鳳以失守城池  
之郭光祖委署左江道以私罪奪職之推官季弈聲復原任  
敕部議處如例十七年出按山西甫半載墨吏皆解綬去康熙  
五年巡視兩浙鹽政八年內大臣鼐拜獲罪拘禁大學士班布  
爾善以結黨行私任意票擬伏誅公疏請飭大學士等均內直

票擬公同候旨杜任意更改之弊從之又言自順治十八年以後督撫多夤緣而得有所恃以無恐勒索屬員朘剝百姓根深蒂固惟其意所欲爲自與受同罪之法嚴無敢糾督撫之貪者與者不認則言者涉虛卽確然有據亦不能執其人而問之矣有貪之利無貪之害彼何憚而不爲耶乞賜親裁罷斥溺職督撫吏治庶有起色於是直省督撫降黜休致者數人九年八月內陞命支四品俸仍任御史十一年超拜左副都御史疏言吏治之敝在文法太密方面有司嘗有在任三兩年而罰俸至二三十年者夫俸薄尙恐不足養廉况積年無俸能責其潔己愛民乎且例之所在不問賢不肖但繩之以法雖廉能卓

著遇細故亦多。望誤以去賢者不可多得來者不必盡賢徒病民而使權歸胥吏焉。用之請除去繁苛求實效。疏並下。所司議行。會巡鹽御史杭奇常錫允以詐贓爲商人控告。命公赴浙察審得實。並論絞擢吏部右侍郎。十二年夏。命以兵部侍郎總督浙江軍務。洎事甫兩月。吳三桂反雲南。公檄總兵李榮副將王廷梅牟大寅陳世凱鮑虎等分道禦賊。又請調江南滿漢官兵駐閩浙交界處。並發江西重兵守鉛山玉山。以壯聲援。當是時。賊由常山陷開化壽昌淳安。由處州犯義烏浦江東陽湯溪龍游。叛鎮祖宏勳陷平陽踞溫州。尋陷黃巖。犯台州及紹興。集悍卒數萬窺衢州。公偕平南將軍賴塔率滿兵千餘旗兵二

千鄉勇五百以五月自杭趨衢時自巡撫以下僉謂會城根本地不當移鎮公曰今日事勢所爭在衢上游失則全浙動搖江淮以南皆不能安枕矣遂行七月閩賊大舉攻衢眾寡不敵公大閱將士於水亭門宣布朝廷厚恩陳說大義眾感泣願決死戰兵既接礮聲震地流丸如雨左右請少避公不可曰今日之事以兵勝敗爲吾生死可稍怯耶守備程龍怯戰斬以徇於是將士殊死戰一可當百遂敗賊於陝西斬馘數千陳世凱等乘勝復義烏湯溪牟大寅破賊常山游擊王世萬破賊龍游鮑虎復壽昌王廷梅敗賊於金華李榮復東陽尋大敗賊於金華之壽溪斬僞總兵張元兆等毀寨十八參將洪起元敗賊於紹

興復嵯縣先後得 旨嘉獎時大將軍康親王統禁旅出金華。遣貝子傅拉塔等剿賊溫台賊之在處州者逼衢州東南在江山者逼衢州西南公分飭守禦勿遽迎擊乃奏增本標爲五營得兵五千十一月賊眾五萬自常山逼衢州結寨數十冀聯南路賊巢公與賴塔督兵進戰斬賊萬餘追奔二十里十四年冬疏言被賊之地一望蕭條啼號載路卽如衢州近城難民九千七百有奇散處各鄉者不可數計請發庫金賑從之時賊帥馬九玉朱懷德等屯踞江山常山開化其溪口清湖大溪灘茅村前嶺皆列賊營且散布處州金華山谷四出窺犯公命榮世凱廷梅等分路攻剿皆大捷五月公與賴公乘連旬水漲由南塘

擄賊前嶺陣斬七百餘級。墜崖落水死者無算。十五年春，遣將由遂安截賊後路，連破賊寨，復開化。公遂建議直搗仙霞關，爲摧堅制勝之策。有詔命公條上進取機宜。公言：進取之路不在溫處，在三衢。今悍賊悉萃於此，此賊破，諸賊必駭散。雖僞將馬九玉、朱懷德等抗拒河西，而江常之閒有閒道可襲。我軍進擊，使賊首尾不相顧，從此入閩可奏蕩平矣。疏入，從之。時康親王白金華至衢州，八月，合軍進克大溪灘，復江山縣。將戰，王問公策，以必勝。明日，捷書至，王大喜，曰：岳忠武之策，楊么不是過也。時馬九玉猶冀繞道奪仙霞，而諸將已受公密檄，急據關口夾擊。賊將金應虎等窮蹙乞降。於是康親王大軍遂入閩，臨



行。公啓曰。王但飭諸軍。勿撓掠。卽長驅入福州。兵不血刃矣。未幾。精忠降。檻送京師。時溫處賊悉解散。而僞總兵馬鵬汪文生。陳山。僞將軍程鳳等。猶分踞江西之鉛山玉山弋陽德興。公疏請會剿。而江西兵方禦三桂逆黨於袁州。不遑東顧。公遂遣將克玉山。破賊木城。六。又自白沙關趨德興。破賊寨。十有三。擒馬鵬。斃之。別將復鉛山。興安。弋陽。貴溪等城。捷聞。加兵部尙書。十六年夏。遣參將蔣懋勛等。剿玉山之巖。椒洞。陳山。率眾降。程鳳死。其妻王氏。以所屬六萬七千餘人。就撫。而僞總兵林爾瞻。尙擁眾數萬。以鉛山上饒。興。福建。光澤。錯壤之石壠。爲巢穴。公命懋勛等。由鉛山進剿。分扼要隘。率數騎入寨。招撫。乃以眾二萬。

出降。又僞都督李日生僞提督洪成龍分踞王山之八仙洞老鼠洞十七年。公遣懋勛及參將閻進等討平之。各斬賊千餘。毀其寨。時海寇鄭錦窺伺顏海郡邑。公遣將敗賊於象山。又敗之於溫州。賊將詹天樞遂赴總兵陳世凱軍前降。十八年檄定海總兵牟大寅巡海遇賊。戰於孝順洋。斬僞將童耀等。及賊兵三千有奇。毀船十九。獲船十五。賊奪氣遁。公念賊平後最急者無如蠲免及賑卹。疏請豁金衢嚴溫處五郡十六年以前額賦部議不可。公上言恤民以固邦本。裕賦以資國用。兩者並重。然必使有可生之民而後有可征之賦。浙東被賊蹂躪。民不聊生。不急予蠲免。則舊逋旣缺。新逋愈積。卽日黜一官於事。無濟且蠲。

此不可復征之賦。俾民得休養生息。以供將來之稅正。所以爲國家財賦計也。特詔從公言。貧民陷賊中來歸者。公悉給衣廩。又設淖糜於通衢。賑往來饑民百二十二萬有奇。流移盡復故土。方事之殷。羽檄日數至。人情洶懼。東南數千里。惟視公一人爲安危。孤軍扼險。搢拄三載。卒使浙水以西。無匹馬。簡輪。援及境上。則皆公守三衢力也。公以文臣躬振甲冑。冒矢石。大小百四十餘戰。所向克捷。雖宿將皆謝不如。而部議敘功。僅及十一二。前後招降文武僞官六千二百有奇。賊兵十六萬五千五百有奇。中樞敘武職加至二十九等。銓曹敘有司亦如之。獨以督臣轄全省不敘。再奉諭旨。乃酌加三級。久之。授雲騎尉。

世職或有言賞不酬庸者公瞿然曰凡此敘錄皆出特恩雖  
胙土之榮不是過也二十一年秋還杭州冬召爲兵部尙書  
入朝口不言功有問及者則曰

天子廟謨將帥用命吾何有焉二十三年調吏部飭諸吏坐曹  
聽行文書無得與銓事宿弊一清明年夏患癰詔遣御醫診

視頒上方珍藥旣愈以老疾請溫旨慰留二十五年復請尋

授文華殿大學士辦理機務明年春致政歸二十七年乘輿

南巡過德州公迎謁道左

聖祖垂詢曰卿尙能乘騎至此邪賜上尊玉粒慰勞倍至里

居凡七年薨時三十三年十一月也年七十有三是日天鼓鳴

大星夜隕計聞。

上軫悼。賜祭葬。特諡文襄公。初在言路。以謇諤聞。彈劾貴要。無所避。既督兩浙。沈毅持大體。不輕言笑。而批會案牘。能曲盡物情。在軍堅守賊衝。有進無退。與諸將軍約。有犯令者必按法治罪。使知吾輩不縱兵以毒民。則民心固而軍法亦立。將軍然之。未幾滿兵有犯法者。公升堂發令箭詣將軍。縛兵至斬之。百姓皆歡躍。舟次富陽。一卒與賣菜傭競立。鞭之。嗣是滿漢兵莫敢不奉法。以能有成功入筦部。務嶽嶽無所詭。隨國家有大議。片言擘畫。確不可易。敷歷中外四十年。以精勤奉職。以恪誠事主。以天下善人君子得行其志爲愉快。嘗言士大夫立名節。易

全名節難每聞中朝錄一正人輒喜形於色曰天下蒼生福也

雍正十年詔入祀賢良祠乾隆三十二年

高宗追念公功所得世職命世襲罔替

米敏果公事畧

子貞襄公馬斯喀 文穆公馬齊 勤恪公馬武 莊愨公李榮保

公諱米思翰。姓富察氏。滿洲鑲黃旗人。父恪僖公。哈什屯。天聰中。授侍衛。擢禮部參政。從征瓦爾哈部有功。崇德三年。禮親王代善。聞明總兵沈志祥欲率石城島兵眾歸附。遣恪僖公招之。志祥遂來歸。六年。大軍圍明錦州。明總督洪承疇率兵十三萬赴援。據松山。總兵曹變蛟夜犯。

御營。恪僖公先眾捍禦。手腕中鎗。仍裹創力戰。卻敵得優。賚白金及蒙古二戶。順治元年。擢內大臣。予騎都尉世職。晉輕車都尉。加一雲騎尉。列議政大臣。七年秋。攝政睿親王有疾。恪僖公同貝子錫翰等往視睿親王。曰。子有疾。

上宜臨視。又曰：勿以予言奏請。既而車駕幸視之。王以大臣等違令擅請也。罪之。降世職爲騎都尉。明年。

世祖親政。鑒其無罪。復所降職。尋晉一等男。初。冷僧機與恪僖公同爲內大臣。冷僧機諂附攝政王。及王薨。冷僧機揄揚其功。績。因誣奏。昔日兩黃旗大臣謀立肅親王事。詔下法司鞫問。集恪僖公及議政大臣巴哈等質之。盡得其阿諛誣陷罪狀。肅親王之爲睿親王。害也。尙書鞏阿岱與都統和洛輝等議殺肅親王子富綬。恪僖公言：王無滅嗣之罪。與巴哈力持。不可事。乃已。至是。

世祖封富綬爲顯親王。和洛輝以黨附睿王。爲議政大臣。蘇克



薩哈所劾。磔死。鞏阿岱與冷僧機朋比爲奸。事覺。詔逮勒恪。僖公亦質之。遂皆伏法。時鄭芝龍歸誠。授子爵。隸正黃旗。其子鄭成功仍踞海島。寇掠福建。恪僖公奉命偕內大臣遏必隆。鼐拜大學士。范文程宣諭芝龍。令其招降成功。芝龍因遣人往福建。取其妻妾及幼子至京。十二年。加太子太保。兼一雲騎尉。奉命往朝鮮勘獄。還奏稱旨。尋致仕。康熙二年薨。年六十有六。賜祭葬。諡恪僖。乾隆元年。詔入祀賢良祠。十三年。冊諡。

孝賢純皇后。推恩先世。追封一等公。長子米思翰。襲一等男。兼六雲騎尉。卽敏果公也。康熙六年。由侍衛總管內務府。時輔

政大臣有欲假用尙方器具者。公曰。惟名與器不可以假人。嚴拒之。或怵以危言。不爲動。

聖祖皇帝既親政。知其守正不阿。授禮部侍郎。八年。擢戶部尙書。列議政大臣。先是各直省歲賦。聽布政使存留司庫。時有挪移虧缺之弊。公疏請通飭各省。自俸餉諸經費所餘悉解部。由是句稽出納。瞭如指掌。當是時。天下一統。邊境乂安。而尙可喜。鎮廣東耿精忠。鎮福建藩屬將弁咸情遊驕縱。吳三桂鎮雲南尤自恣。要請無已。俸餉多浮糜。輓輸勞費十二年。可喜請撤藩。歸老遼東。三桂精忠亦陽請以覘廷議。疏下戶兵二部。公與兵部尙書明珠等議。令俱撤藩。移山海關外。時廷臣有言三桂不

可撤者以兩議入奏公堅持宜撤得旨允行既而三桂叛

聖祖命王貝勒大臣帥八旗兵征討議者以軍需浩繁謂宜就近調兵禦守公言賊勢大非緣族兵所能制宜用八旗禁旅會剿至軍需內外協濟足支十年可無慮乃請以內府所儲分年發給復綜核各省庫金倉粟以時撥運皆稱旨十三年疏言大兵剿賊屢奉明詔以正賦給軍需恐有司或借端私派請敕各督撫嚴察所屬凡供應糧餉薪芻一切動用官帑毋許苛派其購自民間者務視時價給值勿纖毫累民奉諭如議速行公長戶部清操矧然竭力治軍需以勞成疾是年十二月薨於位年四十有三

聖祖軫恤備至。賜祭葬如典禮。謚敏果。方三桂精忠之相繼叛也。滇黔楚蜀閩粵悉爲賊踞。人謂撤藩實速之變。爲持議者危。

聖祖諭廷臣曰。朕自少時卽以三藩勢熾。日熾不可不撤。豈因其叛遂謾過於人耶。及逆黨平。

上追憶持議諸臣。猶諭稱公不置。乾隆元年。詔入祀賢良。

祠。十三年。推。

孝賢皇后恩。追封一等公。子四。曰馬斯喀。馬齊。馬武。李榮保。

馬斯喀。初任侍衛。兼佐領。洊擢副都統。領侍衛內大臣。康熙三

十五年。三月。

上親統大軍由中路進征噶爾丹。命領鑲黃旗馬鎗兵以從。  
先期奉命同內大臣等議定出征營陣隊伍序次。四月，駕  
駐什巴爾台。距克魯倫河不遠，而西路軍尚未至圖拉。諭王  
大臣集議機宜。信郡王鄂札等請駐師稍待。馬斯喀與內大臣  
明珠等議，卽進薄敵營。

上從其議。五月，師抵克魯倫河。噶爾丹望見，御營大驚，奔竄。  
上親統師追至拖諾山。命馬斯喀爲平北太將軍，率師追勦。  
至巴顏烏蘭噶爾丹已先遇西路軍，轉戰至昭莫多大，敗竄遁。  
馬斯喀迎會西路軍，收集降人千餘，乃班師。尋列議政大臣九  
月，扈駕出邊經理軍務。十一月，命帥師駐大同。三十六年

春授昭武將軍移師甯夏。敕參贊撫遠大將軍費揚古軍務。先是伊拉古克三胡土克圖自內地盜馬逃歸噶爾丹。大將軍令以降人導引率兵追之。坐追勦遲緩論革任。詔留內務府及佐領任。尋授都統。四十三年六月薨。賜白金千兩。遣內大臣領侍衛十人奠茶酒。命皇子於發引時往。賜祭葬。予諡貞襄。

馬齊由廕生授員外郎。累遷郎中內閣侍讀學士。康熙二十四年授山西布政使。就遷巡撫。二十六年夏

上嘉直隸巡撫于成龍清廉。命九卿各舉廉吏。大學士等以馬齊及范承勳姚締虞對。會御史陳紫芝疏劾湖廣巡撫張汧。

貪黷。詔馬齊及于公成龍往鞫得實論如律二十七年。遷左都御史。命籌議遣官與俄羅斯定界事。疏言俄羅斯侵踞疆土。我守邊官兵困之於雅克薩城本可卽行剿滅。聖慈寬容。不忍加誅。釋歸。故土今悔罪乞和。已蒙俞允。特遣大臣往議。垂之史冊。所關甚鉅。其檔案宜兼書漢字。漢官一體差往事。下部議行。五月。命同尙書張玉書等往閱罷任總河靳輔所修中河諸工善否。暫署河道總督。二十九年。列議政大臣故事。都御史不預議政。異數也。尋擢兵部尙書。明年春。詔安輯喀爾喀於沿邊內外。避噶爾丹劫掠。命偕侍郎布圖等先往調集左右翼部長。至上都河等處候。

上親行撫綏。四月，駕臨閱視。命詳議喀爾喀諸王貝子公等坐次儀節宴賚之。又明年，調戶部尚書。三十三年奉命往盛京督賑，尋奉命往賑山西平陽等屬。地震被災戶口動帑金十有二萬，并停征洪洞浮山等處額賦。三十五年春，

上親征噶爾丹。先期，命往調喀喇沁翁牛特兵還朝，兼理藩院尚書。命與大學士阿蘭泰等分班直宿禁城。是年，噶爾丹敗遁。詔以來春駐蹕邊外，調度搜剿機宜。命先往甯夏安設驛站，並察勘行途宿次。三十七年，命偕副都統烏達禪等往沿喀爾喀諸部會盟宣諭禁約。三十八年，奉命勘漕河，并往山西讞獄還，授武英殿大學士。御書永世翼戴匾額。



賜之。四十七年冬，內大臣佟國維等以建儲事密奏。

上諭滿漢大臣會議保奏。特諭馬齊勿預其事。四十八年正月。

上問廷臣曰：去年冬，朕躬違和，命爾等保奏可爲儲貳者，何以獨保允禩？其日先舉允禩者爲誰？諸臣奏：公同保舉，並無倡議者。

上曰：朕知此事必係佟國維、馬齊授意於眾。眾乃依阿立議耳。馬齊奏諸臣所議，臣實不知。

上復問大學士張玉書等。玉書奏曰：會議日，大學士馬齊、溫達、先臣列班、臣問議舉者爲誰。馬齊答以眾議欲舉皇八子允

禩臣等同行保奏。

上曰。此明係馬齊暗中喻眾。如此大事。尙懷私意。豈非欲樹恩於允禩。爲日後專恣計耶。下王大臣等議立斬。弟副都統馬武等坐罪有差。盡奪其族人官。得旨免死拘禁。是年十二月。俄羅斯貿易人至。

上以馬齊舊管俄羅斯事。復令管理馬武等尋亦起用。五十一年。署內務府總管五十五年。復授武英殿大學士。六十一年十月。

世宗御極。賞輕車都尉。命襲其祖恪僖公一等男爵。合新給世職。晉一等伯。加太子太保。雍正元年。改保和殿大學士。晉太

保三年秋以總理事務竭盡忠誠一賜騎都尉以其第十一子富良襲十三年九月乞致仕允之乾隆四年五月

高宗諭曰原任大學士二等伯馬齊在

皇祖時卽簡任機務倚毗甚殷及

皇考卽位特命總理事務嘉其勞績賞伯爲世襲罔替朕卽位之初以年老力求解退重違其意俞允致仕俾頤養高年以示優禮耆舊之意念其歷相三朝年逾太耄抒忠宣力領袖聯舉朝大臣未有若此之久者茲聞患病甚重本欲親臨看視因北郊在卽時值齋戒不獲親往特命和親王及皇長子永璜公謁親代朕看視望其痊可僅果不起可賞帑金五千兩經理後

事。是月薨。年八十有八。諭部優卹。賜祭葬。贈太傅。諡文穆。仍命富良襲爵。合前襲之騎都尉。晉一等伯。兼一雲騎尉。十五年。詔加伯號曰敦惠。并命入賢良祠。馬武。由侍衛兼管佐領。擢副都統。康熙二十七年。奉命閱視中河。三十五年春。

上親征噶爾丹。命從征。五月。凱旋。十月。從

上駐蹕歸化城。命迎犒右衛兵。還奏兵丁步行者多。食用未裕。詔兵部按籍賞銀。人各三兩四十八年。因兄大學士馬齊與內大臣阿靈阿等議奏保。皇太子事獲罪。馬武亦褫職。五十年。起內務府總管。六十年。遷都統。明年。

世宗御極授領侍衛內大臣四年冬。冊封怡親王以大學士馬齊爲正使。馬武副之。特旨皆晉一秩。十二月疾。遣大醫診視。論曰。馬武事。

皇考五十餘年。不離左右。恪恭謹愼。當盛暑嚴冬。無幾微倦怠之色。其平生胸懷坦白。情性和平。朕念係先朝侍從之人。聞其病重。屢降旨往視。諸大臣合詞勸止。遣親王皇子前往代朕看視。尙望其痊可。儻至不起。著照伯爵賜卹。賞銀千兩。并給世職。以示朕優眷老臣至意。尋薨。賜祭葬如典禮。諡勤恪。子輕車都尉世職子薩喇襲。

李榮保。祖襲二等男。兼一雲騎尉。由侍衛遷前鋒參領。終察哈

爾總管。乾隆二年。以冊立。

皇后彝典。追封一等公。予其第四子富文一等侯爵。十三年。追封米思翰一等公爵之。命下。仍以富文襲。十四年。李榮保第十子大學士忠勇公傳恒。經畧金川功成凱旋。詔視勳臣。額亦都。佟國維之列。賜建宗祠。春秋致祭。自恪僖公始。敏果公及李榮保並入祀。追諡榮保曰莊愨。

白忠勇公事畧

蘇克薩哈 王愨愨公登聯

蘇納海

朱勤愨公昌祚

公諱白爾赫圖。姓納喇氏。滿洲正白旗人。初授兵部副理事官。崇德五年。從圍明錦州。敵出城犯我左翼。力戰卻之。復擊敗杏山敵騎。六年。同前鋒統領吳拜等。屢敗明總督洪承疇兵於松山杏山間。擢前鋒參領。順治元年。大兵入山海關。討流賊。公擊敗僞總兵唐通於一片石。既定燕京。追賊安肅及慶都。大殲其眾。復隨豫親王西。勦李自成。連破賊營。克潼關。二年。移師江南。徇蘇州。擊走明巡撫楊文驄。獲船二十有奇。進征杭州。敗馬士英之眾。分兵徇湖州。用雲梯克其城。三年。隨端重親王博洛征金華。敗賊眾於八步嶺。進定福建。五年。隨鄭親王濟爾哈朗征

湖南時自成餘黨王進才馬進忠袁宗第等分踞寶慶武岡六年公帥本旗前鋒數百人至湘潭遇敵兵萬餘奮擊大破之進征寶慶敗迎戰賊眾克其東門賊於城外結九營將復來犯公擊之潰賊跳河走溺死者無算尋由武岡征沅州過洪山屢敗進才進忠宗第等賊據烏撒堅守偕前鋒科爾坤奪其門擊走之進定全州凱還得優賚八年從征山東土寇戰於涼青山又戰於鳳凰山寨皆斬其將累晉一等輕車都尉十三年擢前鋒統領十五年從信郡王多尼征貴州時明桂王據雲南遣李定國白文選劉正國賈名望等扼踞貴州要隘大兵至安莊衛正國逆戰公先諸將陷陣敗其眾斬正國於響水橋導大兵渡



盤江進克雲南城十六年公率所部進攻玉龍關文選遁躡擊之獲金印一象三馬百有四十擒僞總兵呂三貴等大兵取永昌府渡潞江定國設伏磨盤山山在潞江南二十里亦名高黎貢山西南第一穹嶺也鳥道窅箐曲通一騎定國度大軍累勝窮追必不戒設柵數重爲三伏以待約俟我師至三伏山巔號礮起首尾夾攻我前鋒旣深入伏處覺其謀諸帥急退傳令舍騎而步以礮發其伏公下馬據石立連發三矢殪三人敵大駭潰我後軍繼進合擊之敵兵死林箐中者三之一盛鬪死者三之一我軍殺傷亦畧相當定國坐山巔聞信礮失序驚駭忽飛礮落其前擊土滿面乃奔竄名望據柵拒守公率眾拔柵斬名

望遂取騰越州。桂王及定國文選皆遁窮追踰南甸而還。降明  
閣部大臣侯伯將軍總兵以下百餘人。獲士馬象駝數萬。詔  
信郡王班師。公及都統卓羅畱駐雲南。定國之竄孟艮也。未幾  
復圖入犯。約降將高應鳳內應。以桂王印劄誘元江土司那嵩  
叛。公與卓羅進討。敗賊於磨籠口。進圍元江。掘壕困之。越月城  
陷。那嵩自焚死。擒應鳳斬於軍。賜白金鞍馬。十八年。隨定西  
將軍愛星阿取桂王於緬甸。十一月。會師木邦。聞白文選遁錫  
箔江。公與都統遜塔等簡精銳先發。至則文選已毀橋遁。乃結  
筏以濟。師次舊挽坡。將軍令公率前鋒百人往蘭鳩江。取緬人  
所獻明桂王及其親屬至軍中。康熙元年。詔班師。晉爵一等。

男公在雲南戰功最著。爲輔政大臣。鼇拜所抑。未得優敘。六年。遂與於蘇克薩哈之難。蘇克薩哈者。額駙蘇納長子。公之族人也。少隨征明錦州。及松山杏山。並著戰功。襲父爵三等男。順治八年。任議政大臣。晉一等男。初。隸睿親王屬下。旣睿親王薨於獵所。蘇克薩哈與王府護衛詹岱等。舉首其殯殮。服色違制。及謀遷永平諸逆狀。命諸大臣質訊。皆實。遂論睿親王如謀逆律。十年。以護軍統領同都統陳泰等。率禁旅出鎮湖南。十二年。賊帥劉文秀。遣僞將盧明臣。馮雙禮等。犯岳州武昌。蘇克薩哈伏兵邀擊。大破之。文秀引兵寇常德。戰艦千餘蔽江下。蘇克薩哈揮諸軍奮擊。六戰皆捷。縱火盡焚其船。明臣赴水死。雙禮負

創通降僞將四十餘人。文秀走貴州敘功。晉二等子。任領侍衛內大臣。加太子太保。十八年正月。與索尼及遏必隆。鼐拜同受顧命。爲輔政大臣。奉

聖祖皇帝。嗣統。是時。索尼爲四朝舊臣。遏必隆。鼐拜。皆以公。爵。先。蘇克薩哈。爲內大臣。鼐拜尤功多。意氣凌轢。人多憚之。而蘇克薩哈以額駙子入侍。禁廷承恩眷奉。遺詔輔政。名亞。索尼與鼐拜稱姻婭。而論事多與之。迕積以成讐。會鼐拜欲令鑲黃旗與正白旗互易屯莊。索尼遏必隆皆弗能止。遂行。圈換之。令旗民皆不便。康熙五年。大學士蘇納海坐撥地遲悞。總督朱昌祚巡撫王登聯等坐紛更阻撓罪。皆論死。

上覽部議。召詢輔臣。咸曰。應如議。獨蘇克薩哈不對。上因不允所請。鰲拜卒矯詔。並予棄市。未幾。索尼死。鰲拜益驕恣。蘇克薩哈慮其逼已也。居常怏怏。六年。

聖祖親政。諭部加恩輔臣。越日。蘇克薩哈奏請往守。

先帝陵寢。庶如綏餘息。得以生全有。旨詰問鰲拜與其黨大。

學士班布爾善等。遂文致之誣。以怨望。不欲歸政。構罪二十四款。坐奸詐欺飾。蓄異心。論如大逆。應與其長子內大臣查克旦。皆磔死。餘子六人。孫一人。兄弟之子二人。皆斬決。族人前鋒統領白爾赫圖。侍衛額爾德等。皆斬決。獄具入奏。

上知鰲拜素與蘇克薩哈有隙。構成罪狀。諭以核議。未嘗不。

許所請而醵拜接臂。

上前強奏累日。卒坐蘇克薩哈處絞。餘悉如議。八年五月。醵拜既敗。奉特旨。蘇克薩哈卽有罪。不至誅滅子孫。此皆醵拜挾仇所致。深爲可憫。白爾赫圖等無罪。誅戮尤爲冤屈。其蘇克薩哈及白爾赫圖等。均復原官。於是公得還官。復一等男爵。仍晉三等子。子白爾肯襲爵。尋賜祭葬如典禮。諡公曰忠勇。而蘇克薩哈亦復原官。及世爵三等子。命其幼子蘇常壽襲蘇納海公。姓他塔喇氏。滿洲正白旗人。性慈祥。才識尤明敏。於順治三年。由王府護衛。擢內宏文院學士。歷吏部侍郎。緣事罷。尋起國史院學士。充經筵講官。遷禮部侍郎。加太子少保。再遷。

工部尙書十八年。

聖祖卽昨擢國史院大學士兼管戶部尙書事。時鼐拜等擅權。蘇納海不肯阿附。康熙五年。鼐拜因己隸鑲黃旗。蘇克薩哈隸正白旗。遂欲以正白旗屯莊。改撥鑲黃旗。而別圈民地以與正白旗。使旗人訴請。以牒戶部。公力持不可。謂旗人安業已久。民地曾奉旨不許再圈。宜罷議。鼐拜銜之。矯旨遣貝子溫齊等履勘。旋以鑲黃旗地不堪耕種疏聞。遂遣公會同直隸總督朱昌祚巡撫王登聯經理其事。昌祚登聯交章言兩旗人較量肥瘠。相持不決。而旗地待換。民地待圈。所在荒廢。不耕。農人環訴失業。請停止圈換之令。公亦以屯地難於丈量。候明詔。

進止。鼇拜遂坐以藐視。

上命械付刑部議罪。部議律無正條。擬鞭百。籍沒家產。

上覽疏。召四輔臣詢問。鼇拜極言情罪重大。索尼遇必隆附和之。獨蘇克薩哈不對。

上仍以部議不按律文弗允。鼇拜出矯旨。卽予處絞。八年。

上親政。以鼇拜罪惡眾著。命逮治。旣伏辜。特旨爲蘇納海。

昭雪。敕部予恩卹。賜祭葬。予諡襄愍。以其子瓦爾達爲。

### 三等侍衛

朱公昌祚。字懋功。號雲門。高唐人。隸漢軍鑲白旗。順治初任宗人府啟心郎。十八年。以工部侍郎巡撫浙江。會旱災。捐金倡首。



煮粥以活飢民。復疏請賑卹。時海寇未靖。有旨令瀕海居民遷移內地。公疏請酌撥荒田。令開墾爲生。俟三年成熟。照例起科。其舊所棄之田畝。請蠲其賦。均下部議行。巡按御史旣撤重案。悉歸巡撫。逮繫者數千人。公盡數月之力。判結之得釋者甚眾。復多設方畧。以歸順之利。導賊黨。聞者多解散。大軍征海寇。公厚犒諸將。約以秋毫無犯。并嚴飭有司。不得藉軍興苛斂於民。浙人德之。康熙三年。擢福建總督。以丁憂未之任。四年。特詔起直隸山東河南三省總督。請終制不允。五年抵任。正己率屬遇事執法。無少嬖。嬰會鰲拜圈地議起。遣部臣會同督撫經理旗民。鬱然咸泣訴失業。公上疏極陳其不便。鰲拜怒革職。逮

問部議律無正條擬鞭責籍沒黿拜入奏應置重典。

上未允出矯旨竟予立絞八年黿拜伏罪特諭昭雪復原

官賜祭葬如典禮諡勤愍祀直隸浙江名宦祠子紱以廕入監官至大理卿

王愬愍公諱登聯奉天人隸漢軍鑲紅旗順治初由貢生授鄭州知州巡撫吳景道薦其有德有才遂擢濟南道累遷通政司參議順天府丞大理卿順治十七年擢保定巡撫時海宇初定伏莽尙多官吏艱於緝捕互相容隱公請嚴縱盜之法重寫主之律厚捕首之賞由是盜賊屏息康熙元年裁順天巡撫以公兼理其事加工部尙書銜河間大名所屬災先後奏請發粟賑

濟全活者多。五年冬，以撥園旗地，擾民密疏請令各安舊業，言甚痛切，忤鼇拜意。與總督朱公同論死，旗民哀之。八年，特旨復原官，諭賜祭葬。諡愍愍，祀直隸名宦祠。子盛唐，以廕入監，授督捕理事官。